



UNIVERSITÄTS-  
BIBLIOTHEK  
PADERBORN

**Adnotationes || Et Meditationes || In Evangelia Qvae || In  
Sacrosancto Mis-||sae Sacrificio || Toto Anno || Legvntvr;||**

**Nadal, Gerónimo**

**Antuerpiæ, M. D. XCV.**

De eo, Quemadmodum Spiritus sanctis arguit mundum, &c.

---

[urn:nbn:de:hbz:466:1-78158](https://nbn-resolving.org/urn:nbn:de:hbz:466:1-78158)

DOMINICA QUARTA  
POST PASCHA.

473

De eo quemadmodum Spiritus sanctus arguit mundum, etc.

IOAN. XVI.

ANNO XXXIII.

*In cxxij. imaginem adnotatiuncula.*

cxxij.

A. *Ibidem haec docet.*

B. *Mittit Christus Spiritum sanctum, quo diuino facto tria illa arguuntur.*

C. *Omnes homines adorant crucem, unde arguitur mundus de peccato.*

D. *Ascendit Christus in caelum, unde monstratur eius iustitia, & confutatur mundus.*

E. *Demon profligatus, cui etiam per gratiam Spiritus sancti fideles dominantur.*

105.

EVANGELIUM MISSÆ.

IOAN. XVI.

IN illo<sup>a</sup> tempore dixit IESVS Discipulis suis ; Vado ad eum qui misit me, & nemo ex vobis interrogat me, Quo vadis? Sed quia locutus sum vobis, tristitia impleuit cor vestrum. Sed ego veritatem dico vobis; expedit vobis vt ego vadam. Si enim nō abiero, Paracletus non veniet ad vos: si autem abiero, <sup>b</sup> mittam eum ad vos. Et cūm venerit ille, arguet mundum de peccato, & de <sup>d</sup> iustitia, & de <sup>e</sup> iudicio. De peccato quidem, <sup>c</sup> quia non crediderunt in me. De iustitia verò, <sup>d</sup> quia ad Patrem vado, & iam non videbitis me. De iudicio autem, <sup>e</sup> quia Princeps huius mundi iam iudicatus est. Adhuc multa habeo vobis dicere, sed non potestis portare modò. Cūm autem venerit ille Spiritus veritatis, docebit vos omnem veritatem. Non enim loquetur à semetipso, sed quæcunque audiet, loquetur; & quæ ventura sunt, annuntiabit vobis. Ille me clarificabit, quia de meo accipiet, & annuntiabit vobis. Omnia quæcunque habet Pater, mea sunt: propterea dixi, quia de meo accipiet, & annuntiabit vobis.

Rr 3

ADNO-

**A.** Eodem loco cum surrexisset à mensa, dixit Discipulis Christus quæ hoc Euangelio recitantur; Vado ad eum qui misit me; sed per crucem & mortem: & nemo ex vobis interrogat me, quo vadis? sed hæretis in mea cruce & morte, & in timore vestrarum persecutionum. Itaque nihil aliud quam tristitia & mæore vos conficitis, nec ad fructum crucis mee assurgitis, & gaudium quod pariet resurrectio mea, & incælum ad Patrem ascensio. Audite igitur veritatem meam. Est vobis futurum ut vadā: neque enim aliās veniet Spiritus sanctus nisi ego vadam, quem, quum ad Patrem abiero, mittam. Pater enim tunc illum mittet, simul illum ego mittam à Patre. Ego semper ero vobiscum, per Spiritum sanctum certa victoria & triumphus à me agetur: vici ego enim mundum, peccatum, mortem, confeci iustitiam sempiternam, conculcaui Satana tyrannidem: hæc hæcenus etiam egi, quæ tunc per mortem consummabo.

**B.** Mittit IESVS à celo Spiritum sanctum in Discipulos, quo dono & virtute tria illa designavit Spiritus sanctus quæ prædicat acturum illum Christus. Nam fuit vehemens illa non Iudeorum solum, sed omnium hominum redargutio: videntes enim increduli in credentes caeleste donum descendisse, & peccati arguebatur, & iustitiam Christi confitebantur, & non solum illum iustum, sed iustificantem eos qui in ipsum crederent. Unde consequebatur aperte, non amplius dominari mundo Satanam, sed Christum, & iudicium illud esse ac condemnationem omnis diabolice potestatis.

**C.** Rursus omnes homines crucem adorant & Christum: quæ in re sancti Spiritus virtus ve-

hementer arguit peccati impios & incredulos. Intelliguntur autem hæc à sancto Spiritu fieri non uno tempore solum, sed toto Ecclesie militantis decursu, usque ad seculorum consummationem, & iudicium ipsum universale, in quo plenissime hæc omnia consummabuntur quæ hic prædicat Christus agenda.

**D.** Item ascendit Christus ad Patrem: quæ ascensio & Spiritus sancti missio manifeste demonstrant Christi iustitiam, & illam quæ ipse iustus est, & eam quæ in eum credentes iustificat. Quum enim misit Spiritum sanctum in Ecclesiam Christus, ei simul cum alijs donis claritatem suam communicavit, quæ formaliter qui in Christum credunt iustificatur per sacramentorum efficaciam, per opera item in Deo ex claritate facta.

**E.** Satan profligatus & victus à Christo. Hæc verò redargutio mundi, cuius erat princeps Satan, fuit ab initio in Ecclesia clarissima: nam non solum in credentes & pios homines Demō non dominabatur, sed piorum ministerio per Christi invocationem passim expellebantur & conculcabantur Demones, atque e suis idolis & templis eiciebantur. Vis ergo trium redargutionum hæc est: non crediderunt in Christum, quare mundum de peccato cōdemnat Spiritus sanctus: abijt Christus ad Patrem, misit Spiritum sanctum per quem iustificat pios; quare illustris fit Christi iustitia, & palam mundi impietas: victus & conculcatus est Damon à Christo, quod & quæ dicta sunt, & piorum potestas in Demones demōstrat; ita à Spiritu sancto mundus cum Demone simul iudicatur & condemnatur.

## MEDITATIO.

**A.** Bisisti, sancte IESV, ad Patrem, ad eius dexteram sedes, & in ipsius es gloria, misisti Spiritum sanctum ad nos, qui maneat nobiscum in æternum: itaque nos quidē non te interrogamus, quò vadis? attamen nõ aperimus oculos mentis nostræ, non sensum cordis, ut intelligamus quàm fuerit nobis utile, te à nobis corporali & sensibili præsentia abesse: ut videlicet acciperemus Spiritum sanctum à Patre & à te, cuius virtute illustrarentur corda nostra & confirmarentur; illam verò tuam præsentiam sensilem expectaremus in finem temporum, cum ad iudicandum orbem ve-

nies: interim Spiritus sancti consolatione essemus contenti, & sensilem tui visionem mutaremus in spiritualem, quam nobis per virtutes, per dona, per beatitudines, & fructus Spiritus subministras per Spiritum sanctum tuum. Hic sensus nobis est utilior in hac mortalitate, quod, bone IESV, significasti tuæ Magdalena, cum noluisti ab ea tangi. Et tamen semper es nobiscum in Eucharistia: tuæ Sacramento, & nonnunquam sanctis tuis, ijs scilicet qui solent te alioqui in spiritu contemplari, appares de tua singulari benignitate. Hæc vitinā, Domine, ut verbis recēsemus, ita

ita in timo spiritus nostri sensu perciperemus atque exprimeremus: sed nos cum repositam nobis tantā gratiā in hac tua abitione sciamus, illam tamen non agnoscimus, alia agimus, alia nos mouent, hæc non mouet: auertimus animum à spiritualibus, & ad sensualia applicamus; qui re vera luctus noster est: nam quid aliud quàm luget spiritus, vbi sensus gaudet? Erige animum nostrum Domine, & recondita virtutis tuæ magnitudinem nobis aperit. Atqui aperuisti iam, atque ob oculos omnium fidelium, atque adeo mortaliū omnium, exposuisti triumphū tuæ crucis. Triumphasti enim de hostibus tuis omnibus, peccato, morte, mundo, Satana: expoliasti principatus, potestates, non solum spirituum malignorum, sed peccati, mortis, mundi; omnem potentiam conculcasti & traduxisti palā, tuæ crucis diuinam virtutem in luce tuæ veritatis manifestans, & illorum impotentiam atque ignominiam: in cruce tua, absorpta sunt illa omnia in victoria. Vbi enim est, ô mors, ô peccatum, ô munde, ô Dæmō, victoria vestra? vbi vester stimulus, vbi vestra virtus? expugnata sunt hæc omnia atque contrita per crucem tuam fortissimè IESV. Solus igitur tu hunc triumphum agis de hostibus tuis, formosus in stola tua, & gradens in multitudine virtutis tuæ: conculcasti enim eos in furore tuo, & inebriasti eos in indignatione, & detraxisti ad terrā virtutem eorū. Omnium miserationum Domini recordemur & laudum, super omnibus quæ reddidit nobis Dominus, & super multitudinem donorum quæ largitus est nobis, secundum indulgentiam suam, & secundum multitudinem miserationum suarum. Hunc triumphum egisti, magne IESV, in cruce, & agis continenter per crucem. Neque verò hoc fuisti contentus triumpho; sed Spiritum præterea tuum misisti, vt ipse quoque mundum triumpharet, & tuam victoriam & gloriam exaltaret. Quid enim Spiritus sanctus iam inde postquam à te missus est gessit? quid gerit? quid querit? Agit suum de tuis hostibus triumphum, confirmat tuum. Coarguit enim mundum & conuincit gloriosissimè, vbi exaltata fide tua tam

potenter, tam latè, tanta luce Evangelica veritatis in cordibus fidelium exorta & operibus illustrata, traducitur eorum peccatum & impietas, qui in te vel non crediderunt, vel non credunt, vel hæreticè vel peruersè credunt. Agit præterea Spiritus sanctus de mundo triumphum, ostendens te iustum, illum iniustum: mundus enim te condemnauit ad mortem omni acerbitate, contumelia, & ignominia plenam, atque inter latrones crucifixus; Pater verò caelestis te ad dexteram suam in caelo collocauit gloriosissimè. Mundus te vt blasphemū & impium, vt seditiosum damnauit; iustitiam tuam & gloriam super calos exaltauit Pater omnipotens, vt sit ipse, & tu iustus, & iustificentur per te qui ex fide sunt tua sancte IESV. Coarguit enim palam impietas & iniustitia hominum & peruersitas ex Euangelij tui luce & gloria per Spiritū sanctum tuum. Triumphat item mundum & coarguit Spiritus tuus, vbi eius Principem demonstrat esse iudicatum à te vt victum: nō solum autem à te, sed ab his qui in te credūt, per te indies illum profigari ac vinci. Illa item tua est gloria, Christe IESV, quod nos simul triumphas, hoc est triumphare de hostibus tuis & nostris facis, per tui imitationem, per nostras passiones atque operationes in te. Hæc omnia cum ita sint, intelligo tamē, bone IESV, triumphos hos agi, non esse finem illis impositum: triumphus agitur quidem de omnibus, verum repugnant adhuc, negotiū nobis exhibent hostes tui de tua singulari providentia. Huiusmodi igitur triumpho imponitur tūc terminus, vbi tradideris regnū Deo & Patri, & euacuaueris omnem principatum & potestatem & virtutē; cum mortale hoc nostrum induerit immortalitatē; accipient enim tunc hi triumphus consummationem & gloriam sempiternam. Agimus tibi gratias immortales, magne IESV, de tua in nos benignitate & triumphis tuis: fac porro dignè triumphum nostrum à nobis agi de hostibus tuis & nostris, vt gloriemur in laude tua, & in virtute magnitudinis & gloriæ tuæ exultemus, & bonis operibus in te abundemus. Amen.

RES DOMI-